

Khamis, 7 Januari 2016

### 1. Bauksit: Wujud unsur rasuah

**SPRM terima banyak aduan isu penceramaran alam sekitar**

KUALA LUMPUR 6 Jan. - Siasatan Suruhanjaya Pencegahan Rasuah Malaysia (SPRM) mendapati wujud unsur rasuah dalam aktiviti pengeluaran bauksit di Pahang.

Dalam satu kenyataan hari ini, SPM memaklumkan pihaknya telah menerima banyak aduan berkaitan isu pencemaran alam sekitar akibat aktiviti perlombongan bauksit berkenaan.

"SPRM memandang serius perkara ini dan tidak teragak-agak untuk mengambil tindakan terhadap mereka yang terlibat dalam jenayah rasuah serta salah guna kuasa tersebut di bawah Akta SPM 2009," kata kenyataan itu.

Isu bauksit menarik perhatian ramai sehingga memaksa Kabinet hari ini memutuskan untuk mengenakan moratorium (henti sementara) ke atas aktiviti perlombongan dan pengeksportan bauksit di negeri Pahang selama tiga bulan bermula 15 Januari ini.

Perkara itu diumumkan Menteri Sumber Asli dan Alam Sekitar, Datuk Seri Dr. Wan Junaidi Tuanku Jaafar yang turut dihadiri Menteri Besar, Datuk Seri Adnan Yaakob.

Khamis, 7 Januari 2016

### 2. Perlombongan, eksport bauksit dihentikan tiga bulan

KUALA LUMPUR 6 Jan. - Kabinet mengarahkan semua aktiviti perlombongan dan pengeksportan bauksit di negeri Pahang dihentikan sementara selama tiga bulan mulai 15 Januari ini bagi membolehkan satu pelan penyelesaian pencemaran dilaksanakan oleh pihak kerajaan.

Menurut Menteri Sumber Asli dan Alam Sekitar, Datuk Seri Dr. Wan Junaidi Tuanku Jaafar, keputusan tersebut dibuat selepas mengambil kira semua aspek termasuklah pengusaha serta orang ramai yang terjejas dengan aktiviti perlombongan bahan mineral ini.

"Kabinet memutuskan untuk mengenakan moratorium atau penggantungan ke atas aktiviti ini dan kementerian bersama kerajaan negeri akan mengambil tindakan sewajarnya bagi menyelesaikan

masalah pencemaran yang berpunca daripada aktiviti tersebut," katanya dalam sidang akhbar di sini hari ini.

Yang hadir sama, Menteri Besar Pahang, Datuk Seri Adnan Yaakob; Ketua Setiausaha Kementerian Sumber Asli dan Alam Sekitar, Datuk Seri Azizan Ahmad dan Setiausaha Kerajaan Negeri, Datuk Seri Muhammad Safian Ismail.

Wan Junaidi berkata, setakat ini, terdapat sebanyak 22 pengusaha perlombongan yang sah terlibat dalam aktiviti perlombongan ini dan pihaknya telah mengadakan pertemuan dengan mereka untuk membincangkan mengenai perkara ini.

Katanya, untuk bulan pertama pelaksanaan moratorium itu, kerajaan mengarahkan supaya semua stok penyimpanan bauksit di Pelabuhan Kuantan dikeluarkan serta dapat dibersihkan.

"Kita tidak mahu lambakan bauksit di Pelabuhan Kuantan ini akan mengalir serta memasuki laut sehingga menyebabkan pencemaran seperti yang berlaku sebelum ini.

"Selepas itu, untuk bulan kedua, semua 11 pusat pengumpulan di sekitar pelabuhan mestilah mengosongkan bauksit mereka dan diantar ke satu sahaja pusat pengumpulan yang akan diumumkan kemudian oleh pihak kerajaan negeri.

"Namun, sebelum 11 pusat pengumpulan ini dikosongkan, pengusaha bauksit perlulah membina tempat mencuci supaya lori yang keluar dari kawasan itu tidak mengotori jalan raya," jelasnya.

Tambah beliau, kementeriannya juga telah membekukan kelulusan mengeksport bauksit ke luar negara kepada pengusaha bahan mineral itu.

"Selepas tempoh tiga bulan ini, kita akan mewujudkan pusat penyimpanan bauksit berpusat di mana hanya lori yang mempunyai permit yang sah dibenarkan untuk meletakkan bahan mineral mereka itu di situ.

"Daripada pusat pengumpulan itu pula, lori akan mengambil bauksit dan membawa terus menaiki kapal untuk dieksport tanpa perlu menyimpannya di dalam Pelabuhan Kuantan," katanya.

Katanya lagi, jika tempoh tiga bulan tidak dapat dilaksanakan semua perkara ini, pihaknya akan memanjangkan tempoh sehingga enam bulan supaya perkara ini dapat diselesaikan dengan sempurna.

"Semua peraturan dan syarat perlombongan serta pengeksportan yang telah ditambah baik akan dikuatkuasakan selepas tamat tempoh moratorium ini.

"Dalam tempoh pelaksanaan moratorium ini, pihak kerajaan akan melaksanakan penguatkuasaan bersepada melibatkan pelbagai agensi penguatkuasaan seperti tentera, polis, Jabatan Pengangkutan Jalan (JPJ) dan Suruhanjaya Pengangkutan Awam Darat (SPAD)," katanya.

Khamis, 7 Januari 2016

### 3. Belanja cara berhemat

#### Teruskan program rakyat tetapi jangan berlebih-lebih- Perdana Menteri

KUALA LUMPUR 7 Jan. - Perdana Menteri, Datuk Seri Najib Tun Razak mengingatkan anggota-anggota Kabinet yang mengetuai kementerian masing-masing untuk membelanjakan peruntukan yang diberikan kerajaan secara berhemat.

Walau bagaimanapun, Perdana Menteri mahu program-program untuk kesejahteraan rakyat perlu terus dilaksanakan.

Namun, kata Perdana Menteri, program-program tersebut perlu dipastikan agar meninggalkan kesan positif kepada rakyat keseluruhannya tanpa perlu perbelanjaan berlebih-lebihan.

"Dalam Mesyuarat Jemaah Menteri pertama 2016 yang saya penguruskan semalam, saya telah mengingatkan kepada Kabinet untuk membelanjakan peruntukan yang diberikan secara berhemat dan bijak.

"Walaupun demikian, program untuk rakyat perlu terus diadakan dan pastikan program-program tersebut meninggalkan kesan positif kepada rakyat keseluruhannya tanpa perlu perbelanjaan yang berlebih-lebihan," katanya menerusi media sosial Facebooknya hari ini.

Budget 2016 memperuntukkan sebanyak RM267.2 bilion berbanding RM260.7 bilion pada tahun lalu. Dari jumlah tersebut, sebanyak RM215.2 bilion adalah untuk perbelanjaan mengurus dan RM52 bilion bagi perbelanjaan pembangunan.

Bagi peruntukan pembangunan, sektor ekonomi menerima agihan tertinggi sebanyak RM30.1 bilion diikuti sektor sosial sebanyak RM13.1 bilion merangkumi pendidikan dan latihan, kesihatan, perumahan serta kesejahteraan masyarakat.

Jumaat, 8 Januari 2016

#### 4. Empat pegawai PTG Pahang ditahan

Disyaki terima rasuah daripada pelombong bauksit

KUANTAN 7 Jan. - Suruhanjaya Pencegahan Rasuah Malaysia (SPRM) menahan empat pegawai penguat kuasa Pejabat Tanah dan Galian (PTG) negeri kerana disyaki menerima rasuah daripada pelombong bauksit haram bernilai lebih RM100,000, semalam.

Pengarah Bahagian Siasatan SPM, Datuk Azam Baki berkata, empat suspek berusia antara 30 hingga 38 tahun itu ditahan di rumah masing-masing pada pukul 6 petang hingga 9 malam bersama wang suapan ditemukan di dalam sebuah mesin basuh di rumah salah seorang daripada mereka yang merupakan pegawai kanan.

"Berdasarkan siasatan sejak dua bulan lalu, semua suspek dipercayai menjual dokumen pemindahan mineral (Borang 13D) atau dikenali sebagai doket dalam kalangan pengusaha bauksit. Doket merupakan borang untuk mengangkut bauksit dengan tujuan sebagai jaminan perlindungan daripada tindakan penguatkuasaan.

"Suspek direman selama tujuh hari dan saya berharap kertas siasatan disiapkan supaya mereka dapat didakwa dengan segera," katanya kepada pemberita di sini hari ini.

Yang turut hadir, Pengarah SPRM negeri, Datuk Zainul Darus.

Akhbar hari ini melaporkan SPRM mengesahkan wujud unsur rasuah dalam aktiviti perlombongan bauksit di negeri ini yang dilakukan oleh pihak-pihak tertentu.

Menurut Azam, modus operandi yang digunakan adalah dengan menjual doket tersebut pada harga RM150 hingga RM200 sekeping sedangkan harga sebenar di kaunter PTG adalah RM1.

"Lebih 200 pelombong haram menggunakan doket itu sebagai perlindungan untuk membawa muatan bauksit ke Pelabuhan Kuantan. Berdasarkan prosedur, Borang 13D atau doket yang mempunyai nombor siri itu hanya boleh diperoleh setelah pelombong mendapatkan kelulusan melombong daripada PTG.

"Satu borang hanya dibenarkan untuk kegunaan satu trip penghantaran dan dipegang oleh pemandu yang membawa muatan bahan mineral itu," jelasnya.

Tambah beliau, disebabkan aktiviti suapan itu, Pahang sepatutnya menerima kutipan royalti sebanyak lima kali ganda daripada RM46.7 juta yang diterima pada tahun lalu.

Sehubungan itu, kata beliau, SPRM kini giat menjalankan siasatan dan akan melakukan beberapa tangkapan selepas ini yang bukan sahaja penjawat awam tetapi orang awam terlibat akan diheret ke muka pengadilan.

"Sebelum ini pelbagai rungutan mendakwa SPRM tidak bertindak sedangkan laporan yang diterima adalah berkaitan pencemaran alam sekitar yang di luar bidang kuasa kami," jelasnya.

Azam turut mendedahkan sebelum ini pihaknya melakukan risikan dan siasatan berkaitan isu bauksit namun tidak menghebahkannya kerana melibatkan sensitiviti dan kerahsiaan.

"Apa sahaja laporan berkaitan rasuah kita akan siasat secara menyeluruh dan paling utama adalah mendapat kerjasama daripada orang ramai," ujarnya.



Jumaat, 8 Januari 2016

## 5. Najib arahkan Kementerian Kesihatan segera tangani masalah ICU HTAA, Kuantan

KUALA LUMPUR 8 Jan. - Perdana Menteri, Datuk Seri Najib Tun Razak hari ini mengarahkan Kementerian Kesihatan supaya segera mengambil tindakan untuk menangani masalah di Unit Rawatan Rapi (ICU) Hospital Tengku Ampuan Afzan (HTAA), Kuantan.

Beliau juga mahu kementerian itu mempercepatkan kerja-kerja pembaikan dan menyediakan langkah-langkah sementara bagi menangani masalah pendingin hawa di unit berkenaan.

"Saya ambil perhatian akan laporan akhbar The Star hari ini berkenaan keadaan Unit Rawatan Rapi di Hospital Tengku Ampuan Afzan, Kuantan.

"Kementerian Kesihatan, Datuk Seri Dr. S. Subramaniam (Menteri Kesihatan), Datuk Dr. Noor Hisham Abdullah (Ketua Pengarah Kesihatan), sila ambil tindakan segera menyiasat perkara ini dan mempercepatkan kerja pembaikan serta menyediakan langkah-langkah sementara bagi menangani isu ini secepat mungkin," katanya dalam catatan dalam laman Facebook beliau.

Akhbar berkenaan melaporkan pendingin hawa di ICU hospital itu tidak berfungsi dan tingkap dibiaran terbuka bagi membolehkan udara masuk selain kipas berdiri digunakan untuk menyejukkan pesakit dan peralatan penting.

Kakitangan di unit itu juga terpaksa bekerja dalam keadaan panas dan tiada jalan penyelesaian atau segera diambil.

Akhbar itu memetik Pengarah Jabatan Kesihatan Pahang, Datuk Dr. Zainal Ariffin Omar sebagai berkata bahawa sistem pendingin hawa yang uzur di blok itu sudah tidak berfungsi sejak tiga bulan lepas.- BERNAMA



Isnin, 11 Januari 2016

#### **6. Optimumkan perbelanjaan kerajaan -Najib**

PUTRAJAYA 11 Jan. - Perdana Menteri, Datuk Seri Najib Tun Razak mahu anggota pentadbiran dan penjawat awam melaksanakan langkah pengoptimumkan perbelanjaan dan bukan mengenakan pendekatan jimat cermat dalam pentadbiran pada tahun ini.

Dalam amanatnya pada perhimpunan bulanan Jabatan Perdana Menteri (JPM) yang pertama bagi 2016, di sini hari ini, Najib juga mahu penjawat awam menggunakan daya fikiran kreatif dan inovatif untuk meningkatkan produktiviti.

Beliau menegaskan dua perkara tersebut perlu menjadi tumpuan utama dalam pentadbiran kerajaan pada tahun ini bagi menangani faktor luaran yang tidak dapat dikawal oleh Malaysia.

"Mengoptimumkan perbelanjaan tidak bermaksud sebagai langkah 'austerity' (jimat cermat) potong sana potong sini, tetapi kita melihat bagaimana setiap ringgit yang akan dibelanjakan boleh mendatangkan hasil dan kesan yang paling besar.

"Selain itu, kita boleh tambah lagi usaha kita bukan bermaksud kerja keras sahaja, tetapi menggunakan minda kita berfikir secara kreatif dan inovatif untuk meningkatkan produktiviti. Saya selalu tekankan 'give me solution' (beri saya penyelesaian)," katanya.

Turut hadir pada perhimpunan itu ialah menteri dan timbalan menteri di JPM; Ketua Setiausaha Negara Tan Sri Dr Ali Hamsa; Ketua Pengarah Perkhidmatan Awam Tan Sri Mohamad Zabidi Zainal dan warga JPM. - BERNAMA

Isnin, 11 Januari 2016

## 7. 502 sekolah menengah dilengkapi makmal sains canggih

BESUT 10 Jan. - Sebanyak 502 buah sekolah menengah di seluruh negara akan dilengkapi dengan makmal sains canggih yang lebih fleksibel dan mudah alih bagi keperluan pembelajaran.

Setiap makmal sains itu menelan belanja RM162,704, jauh lebih murah berbanding kos terdahulu iaitu RM300,000 dan akan dibina hasil gabungan kepakaran Kementerian Pendidikan Tinggi dengan Kementerian Pendidikan di bawah Strategi Lautan Biru Kebangsaan (NBOS) dan Program Inisiatif Libat Sama (PILS).

Menteri Pendidikan Tinggi, Datuk Seri Idris Jusoh berkata, pada masa ini sebanyak tujuh makmal sains di tujuh buah sekolah di seluruh negara telah diubah suai serta dinaik taraf.

Menurutnya, sekolah-sekolah itu ialah Sekolah Menengah Agama Sultan Hisamuddin, Sungai Bertih, Klang; Sekolah Rendah Jenis Kebangsaan Tamil Dengkil, Selangor; Sekolah Menengah Kebangsaan Agama (SMKA) Nurul Ittifaq, Besut dan SMKA Wataniah, Besut.

"Selain itu, turut diubah suai Sekolah Menengah Kebangsaan (SMK) Tengku Mahmud 2, Besut; SMK Pelagat, Besut dan SMK Wakuba, Tawau, Sabah.

"Hari ini kita rasmi makmal sains empat buah sekolah di Besut di bawah program NBOS-PILS, gabungan (kepakaran) antara Kementerian Pendidikan Tinggi dengan Kementerian Pendidikan," katanya.

Beliau menyatakan perkara itu kepada pemberita selepas merasmikan makmal sains SMK Tengku Mahmud 2 di sekolah berkenaan dekat sini hari ini.

Yang hadir sama Ketua Setiausaha Kementerian Pendidikan Tinggi, Datuk Seri Ir. Zaini Ujang; Ketua Pengarah di kementerian itu, Prof. Datuk Dr. Asmah Ismail; Pengarah Pendidikan negeri, Shafruddin Ali Hussin dan Pengetua SMK Tengku Mahmud 2, Che Zainun Che Salleh.

Idris yang juga Ahli Parlimen Besut berkata, makmal sains canggih itu juga mampu dibina dalam tempoh singkat iaitu tidak sampai sebulan berbanding tempoh biasa.

Antara keistimewaan yang terdapat pada makmal sains itu ialah bukan sahaja dapat memenuhi keperluan pembelajaran subjek Sains, malah mata pelajaran lain iaitu Biologi, Fizik, Kimia dan Matematik, selain boleh digunakan untuk bermesyuarat.

"Selain itu, makmal ini juga dilengkapi dengan papan putih pintar, kebuk wasap tanpa saluran yang lebih fleksibel dan ia mudah diurus. Ini merupakan hasil kerjasama 20 pensyarah pakar dari universiti awam dan politeknik bagi memudahkan pembelajaran," jelasnya.



Isnin, 11 Januari 2016

#### **8. Dana rakyat tidak digunakan untuk selesaikan isu 1MDB**

PUTRAJAYA 11 Jan. - Dana rakyat tidak digunakan untuk menyelesaikan isu dalam 1Malaysia Development Berhad (1MDB), kata Perdana Menteri, Datuk Seri Najib Tun Razak.

"Isu 1MDB yang saya janjikan pada rakyat tempoh enam bulan sudah pun nampak penyelesaian.

"Yang kita banggakan penyelesaiannya dalam bentuk bukan MoU (Memorandum Persefahaman) tetapi dalam 'agreement' (persetujuan) yang ditandatangani dan lebih mustahak ia tidak guna dana rakyat sama sekali. Ini perlu saya jelaskan," katanya pada perhimpunan bulanan Jabatan Perdana Menteri di sini hari ini. - BERNAMA



Selasa, 12 Januari 2016

#### **9. Pentadbiran lebih berkesan**

##### **Perdana Menteri garis dua pendekatan penting untuk penjawat awam**

PUTRAJAYA 11 Jan. - Datuk Seri Najib Tun Razak menggariskan dua pendekatan penting sebagai fokus penjawat awam bagi mewujudkan pentadbiran lebih berkesan pada tahun ini.

Perdana Menteri berkata, dua pendekatan itu adalah mengoptimumkan perbelanjaan kerajaan dan penggunaan daya fikiran kreatif serta inovatif untuk meningkatkan produktiviti.

Beliau berkata, dua pendekatan itu perlu ditumpukan dalam usaha menangani faktor-faktor luaran yang tidak dapat dikawal oleh negara.

"Kita mesti mengoptimumkan perbelanjaan kita. Apabila saya sebutkan optimumkan, saya tidak memaksudkan sebagai satu 'austerity' (berjimat cermat), kita potong sana, kita potong sini... Tidak. Sebaliknya, kita melihat bagaimana setiap ringgit hendak kita belanjakan boleh mendatangkan hasil atau pun kesan yang paling besar.

"Kedua, kita lihat bagaimana kita boleh gunakan daya fikiran supaya lebih kreatif dan inovatif dalam mempertingkatkan produktiviti. Saya ingin tekankan produktiviti, jangan kita fikir hendak potong dan kurang tetapi kita boleh tambah lagi usaha kita.

"Usaha kita bukan erti kata kerja keras sahaja tetapi tambah lagi waktu kita bekerja menggunakan minda kita. Berfikirlah secara inovatif, kreatif, (dan cari) penyelesaian. Saya selalu tekankan 'give me solution' (beri saya penyelesaian). Ini yang patut kita lakukan," katanya.

Beliau berkata demikian ketika berucap pada perhimpunan bulanan Jabatan Perdana Menteri (JPM) yang pertama bagi 2016 di sini hari ini.

Yang turut hadir, Menteri-menteri di Jabatan Perdana Menteri dan Ketua Setiausaha Negara, Tan Sri Dr. Ali Hamsa.

Mengulas lanjut, Najib berkata, beliau bercadang menubuhkan satu kumpulan kecil bersama Timbalan Perdana Menteri, Datuk Seri Dr. Ahmad Zahid Hamidi dan Ali bagi menyelesaikan masalah projek lambat dilaksanakan.

"Kita akan memanggil kementerian dan agensi berkenaan untuk melihat kenapa sesuatu projek itu terlambat untuk diselesaikan. Sekiranya proses itu menyusahkan atau melambatkan, kita akan lihat semula proses berkenaan.

"Saya minta Unit Penyelarasaran Pelaksanaan (ICU) menjadi sekretariat untuk mengenal pasti di mana tempat-tempat tertentu yang boleh kita beri tumpuan. Dengan ini kita mesti kembali kepada tema yang utama yakni 'Rakyat Didahulukan'," katanya.

Jelas beliau, rakyat mengharapkan semua projek serta program kerajaan dapat dilaksanakan walaupun mereka memahami hakikat bahawa keadaan ekonomi kini berada di luar kawalan negara ini.

Sementara itu, Najib juga berikrar bahawa soal keselamatan dan kesejahteraan rakyat akan terus menjadi tanggungjawabnya sebagai Perdana Menteri.

Dalam masa sama, beliau menyatakan penghargaan kepada pasukan keselamatan negara atas tugas mereka dalam memastikan tiada kejadian keganasan berlaku dalam negara pada tahun lepas.

"Kita bersyukur juga dan berterima kasih kepada pasukan keselamatan kerana tahun lepas tiada kejadian keganasan dalam negara sama sekali. Ini satu kebanggaan kepada kita memandangkan tiada rakyat Malaysia di dalam negara telah terkorban.

"Walaupun kita sedih seorang rakyat Malaysia telah dibunu dengan kejam di selatan Filipina tetapi dalam negara kita, melalui tindakan oleh kita, tidak berlaku apa-apa. Jangan fikir bahawa ini berlaku dengan sendirinya. Ini berlaku kerana kesungguhan dan ketegasan kita.

"Oleh itu, kita tidak akan lari daripada tanggungjawab kita waima apa orang hendak kata tetapi kita letakkan rakyat Malaysia mesti kita dahulukan," katanya.

Rabu, 13 Januari 2016

#### 10. 1MDB akan terus beroperasi - Arul Kanda

KUALA LUMPUR 12 Jan. - 1Malaysia Development Bhd (1MDB) akan terus beroperasi walaupun selepas pelan rasionalisasinya selesai, berikutan ia mempunyai tanggungjawab yang perlu dipenuhi, kata Presiden/Pengarah Eksekutif Kumpulan Arul Kanda Kandasamy.

"Kemungkinan besar kami akan meneruskan 1MDB dengan tanggungjawab ini. Setiap tanggungjawab kini berpadanan dengan siri aliran tunai yang terikat dari segi undang-undang dengan pihak-pihak lain.

"Oleh itu, risiko tidak membayar hutang telah berkurangan dengan ketara," katanya dalam video selama satu minit yang dimuat naik di laman Facebook Buletin TV3 hari ini.

Awal hari ini, menurut 1MDB dalam kenyataan, ia telah melaksanakan perjanjian yang diberi kuasa dari segi perundangan untuk tiga tonggak utama pelan rasionalisasinya bagi tarikh akhir enam bulan yang ditetapkan kerajaan.

Syarikat itu berkata, ia kini memberi tumpuan sepenuhnya untuk melaksanakan terma-terma perjanjian dan mencapai penyelesaian.

Pembayaran sukuk RM5 bilion yang matang pada 2039 merupakan antara tanggungjawab yang pada masa ini dipegang 1MDB, selain penukaran liabiliti kepada aset dengan International Petroleum Investment Company Abu Dhabi sehingga 2022. - BERNAMA

Khamis, 14 Januari 2016

#### 11. Naikkan nilai kerja Kontraktor Kelas F ke RM300,000

KUALA LUMPUR 13 Jan. - Persatuan Kontraktor Bumiputra Kelas F Malaysia (Perkobf) meminta kerajaan menaikkan had nilai kerja yang boleh diambil oleh Kontraktor-kontraktor Kelas F atau G1 daripada maksimum RM200,000 kepada RM300,000, atas alasan nilai kerja untuk kontraktor kelas itu yang semakin mahal.

Presidennya, Tukiman Radion berkata, kos-kos bahan binaan pada masa ini semakin meningkat dan menyebabkan kerja-kerja yang bernilai di bawah had RM200,000 semakin berkurangan.

Beliau berkata, hal itu memberi kesukaran kepada kontraktor-kontraktor kelas F yang ketika ini berjumlah 24,000.

"Peningkatan kos bahan binaan membuatkan nilai-nilai kerja kini semakin banyak melepas paras RM200,000 berbanding sebelum ini. Ini menyukarkan kami untuk mendapatkan kerja," katanya kepada pemberita di sini hari ini.

Beliau juga mahu kerajaan menjalankan kaedah secara cabut undi bagi kerja-kerja bernilai bawah RM150,000, berbanding pada masa ini yang hanya di bawah RM50,000.

Menurutnya, berdasarkan kaedah semasa, kerja-kerja yang bernilai lebih RM50,000 tidak dilakukan secara cabut undi sebaliknya menggunakan kaedah sebut harga.

Kontraktor Kelas F atau mengikut kelas terbaru, G1 melaksanakan kerja-kerja bernilai di bawah RM200,000 sahaja, lesen bagi kontraktor kelas itu hanya diberikan kepada bumiputera.

Tukiman berkata, had nilai kerja Kelas F sebanyak RM200,000 itu telah lama tidak dinaikkan dan kali terakhir kenaikan dilakukan ialah lebih 10 tahun lalu.

Jelas beliau lagi, anggaran nilai kerja kepada Kontraktor Kelas F yang ditawarkan oleh kerajaan sepanjang tahun 2015 berjumlah RM70 juta.

Mengenai kesan langkah penjimatan kerajaan kepada kontraktor Kelas F, beliau berkata, kerajaan seharusnya mengurangkan projek-projek berstatus mega dan bukan mengurangkan kerja-kerja yang dikhaskan kepada kontraktor Kelas F.

Hal itu katanya, kerja-kerja untuk Kelas F lebih bersifat pembersihan dan baik pulih yang tidak boleh diabaikan bagi memastikan aktiviti harian tidak terganggu.

"Tambahan pula sesiapa yang mempunyai lesen Kelas F ini lebih bersifat individu, dan setiap pendapatan yang diperoleh terus dibelanjakan ke dalam pasaran sekali gus membantu meningkatkan aktiviti ekonomi. Tidak seperti kelas-kelas kontraktor atasan yang lebih merupakan syarikat dan tidak terus membelanjakan pendapatan yang diperoleh," katanya.

#### **Bilangan Kontraktor Kelas F (G1) seluruh negara 24,000**

**Nilai kerja Kontraktor Kelas F tidak terkesan di bawah Perjanjian Perkongsian Trans-Pasifik. Anggaran nilai kerja Kelas F oleh kerajaan pada 2015 berjumlah RM70 juta**

Khamis, 14 Januari 2016

**12. Air dijamin cukup**

**Kemarau, tiga empangan di Melaka tidak terjejas**



IDRIS HARON (kanan) memperkatakan sesuatu kepada Ambrin Buang (tengah) berhubung buku cenderamata pada majlis penutup Simposium Pengurusan dan Pengauditan Kewangan 2016 di Melaka, kelmarin. UTUSAN/AZLI AHAD

MELAKA 13 Jan. - Kerajaan negeri memberi jaminan bahawa bekalan air di negeri ini mencukupi untuk menampung pemintaan pengguna termasuk pada musim kemarau panjang yang dijangka berlarutan sehingga Mac ini.

Ketua Menteri, Datuk Seri Idris Haron berkata, jaminan itu berdasarkan bekalan paras air di tiga empangan utama negeri ini yang berada pada kapasiti melebihi keperluan.

Menurut beliau, bacaan terkini di Empangan Durian Tunggal, Alor Gajah berada pada kapasiti 95 peratus manakala Empangan Jus serta Empangan Asahan di Jasin masing-masing berada pada tahap 80 dan 100 peratus.

"Setakat ini, bekalan air di tiga empangan utama tersebut dilihat mencukupi hasil usaha mengepam air yang melimpah di kawasan rendah ke empangan tinggi pada musim hujan lalu," katanya ketika diminta mengulas mengenai kesediaan Melaka berhadapan musim kemarau.

Beliau berkata demikian ketika sidang akhbar selepas merasmikan majlis penutup Simposium Pengurusan dan Pengauditan Kewangan 2016 di sini, semalam.

Yang turut hadir, Ketua Audit Negara, Tan Sri Ambrin Buang dan Timbalan Ketua Pesuruhjaya (Pencegahan) Suruhanjaya Pencegahan Rasuah Malaysia (SPRM), Datuk Seri Mustafar Ali.

Idris berkata, apa yang lebih mengejutkan, tahap bacaan air di Empangan Jus yang sebelum ini hanya mencatatkan bacaan tertinggi sebanyak 65 peratus buat pertama kalinya merekodkan kapasiti sehingga 80 peratus.

"Justeru, rakyat negeri ini tidak perlu risau tentang catuan bekalan atau pemotongan pada musim panas ini kerana kita telah menguruskannya dengan baik," katanya.

Sementara itu, beliau meminta rakyat negeri ini memantau aktiviti pembakaran terbuka di kawasan masing-masing dan melaporkannya kepada pihak berkuasa terutamanya semasa musim kemarau.

"Kita juga harus bersama-sama mengelak daripada melakukan pembakaran terbuka kerana ia mampu memberi kesan buruk kepada kesihatan dan alam sekitar ditambah pula dengan cuaca panas yang berlaku sekarang," tegasnya.



Rabu, 20 Januari 2016

### **13. PAC bentang laporan 1MDB Mac depan**

KUALA LUMPUR 19 Jan. - Jawatankuasa Kira-Kira Wang Negara (PAC) dijangka membentangkan laporan hasil prosiding siasatan terhadap 1Malaysia Development Berhad (1MDB) dalam sidang Dewan Rakyat pada Mac ini untuk pengetahuan umum.

Pengerusi PAC, Datuk Hasan Arifin berkata, pihaknya sedang menyiapkan laporan tersebut selepas memanggil beberapa pegawai kanan 1MDB untuk menghadiri prosiding bagi memberikan penjelasan terhadap pelbagai isu yang menyelubungi 1MDB.

"Kami sedang siapkannya agar dapat dibentang di Parlimen pada Mac ini," katanya selepas prosiding PAC di bangunan Parlimen hari ini.

Yang turut hadir Naib Pengerusi PAC, Dr. Tan Seng Giaw.

Sementara itu Hasan berkata, Pengerusi 1MDB, Tan Sri Lodin Wok Kamaruddin telah menghadiri prosiding hari ini selama tiga jam bermula pukul 10 pagi untuk memberikan penjelasan terhadap setiap dakwaan yang dihadapi syarikat pelaburan strategik itu.

Beliau berkata, Lodin memberi kerjasama yang baik dan menjelaskan beberapa perkara, namun banyak lagi perkara akan ditanya dalam prosiding yang bersambung esok.

"Lodin telah menyandang jawatan itu sejak Oktober 2010, maka beliau diminta untuk hadir. Prosiding ini akan disambung semula esok untuk kita bertanya lebih banyak perkara kerana hari ini baharu separuh yang diselesaikan.

"Tiada maklumat yang boleh saya berikan sekarang, saya rasa esok lebih banyak perkara yang menarik akan diberikan kepada media selepas prosiding berakhir," katanya.

Katanya, sebelum ini PAC telah memanggil Pengarah Eksekutif Kumpulan 1MDB, Arul Kanda Kandasamy sebanyak dua kali untuk memberikan penjelasan berhubung prosiding yang sama.

Tambahnya, PAC belum membuat keputusan sama ada akan memanggil bekas pengerusi syarikat itu, Tan Sri Mohd. Bakke Salleh memandangkan beliau hanya memegang jawatan berkenaan selama lima bulan.



Rabu, 27 Januari 2016

#### **14. Jumlah asset Tabung Haji RM10.7b**

KUALA LUMPUR 26 Jan. - Lembaga Tabung Haji (Tabung Haji) menafikan spekulasi dan tuduhan kononnya syarikat milik kerajaan (GLC) itu mengalami masalah kewangan.

Ketua Pegawai Eksekutifnya, Tan Sri Ismee Ismail berkata, jumlah aset terkini milik Tabung Haji sehingga akhir Disember 2015 berjumlah RM10.7 bilion.

Beliau berkata, Tabung Haji juga akan mengumumkan kadar bonus dividen pada awal bulan Februari ini kepada pendeposit selepas segala urusan audit berjaya dilakukan.

Katanya, kadar bonus tersebut diputuskan selepas mengambil kira keadaan ekonomi semasa termasuk pasaran saham, harga minyak dan kadar pertukaran mata wang yang akan memberi kesan kepada ekonomi negara.

"Tahun lepas begitu mencabar dan hasil Strategi Alokasi Aset dan Pengurusan Risiko, kami dapat menjana pulangan pendapatan yang baik.

"Walau bagaimanapun kita juga perlu membuat persediaan yang rapi untuk menghadapi cabaran ekonomi 2016 dan masa hadapan agar lebih berdaya saing untuk menghadapi situasi tersebut. Oleh itu, pendeposit tidak perlu risau kerana ia dijamin oleh kerajaan sebagaimana yang termaktub dalam Akta Tabung Haji," kata beliau dalam satu kenyataan di sini hari ini.

Semalam, beberapa portal berita propembangkang mendakwa Tabung Haji gagal mengisyiharkan dividen kepada sembilan juta pendeposit yang sepatutnya dibayar Jumaat lalu

Dalam pada itu, Ismee berkata, nilai aset Tabung Haji perlu mengambil kira keseluruhan nilai saksama portfolio pelaburan dan pihaknya sedia maklum dengan saranan Bank Negara untuk mengkaji semula polisi rizabnya sebagai langkah penambahbaikan dan pengukuhan yang berterusan.

"Nilai aset yang dinyatakan tidak mengambil kira portfolio pelaburan seperti saham anak-anak syarikat atau syarikat bersekutu serta aset perladangan dan harta tanah yang diduduki Tabung Haji.

"Sepanjang tahun kewangan 2014 dan 2015, nilai keseluruhan aset adalah lebih tinggi daripada nilai liabiliti dengan mengambil kira kesemua nilai saksama portfolio pelaburan Tabung Haji," katanya.



**Khamis, 28 Januari 2016**

### **15. KDNK negara 4.7% - MIER**

KUALA LUMPUR 27 Jan. - Malaysia masih mampu mencatatkan pertumbuhan Keluaran Dalam Negara Kasar (KDNK) sebanyak 4.7 peratus tahun ini, meskipun negara menghadapi situasi ekonomi yang mencabar sejak tahun lalu.

Pengarah Eksekutif Institut Penyelidikan Ekonomi Malaysia (MIER), Dr. Zakariah Abdul Rashid berkata, pertumbuhan negara akan terus dipacu oleh perkembangan ekonomi domestik, selain dibantu atas ekonomi yang kukuh.

Menurutnya, pertumbuhan KDNK yang dibuat oleh institut itu adalah berdasarkan harga minyak yang diunjurkan oleh Dana Kewangan Antarabangsa (IMF) sebanyak AS\$47.97 (RM205.79) setong sementara nilai ringgit antara RM4.20 hingga RM4.30 berbanding dolar Amerika Syarikat (AS).

"Negara ketika itu menerima kesan akibat isu-isu kestabilan jangka pendek yang telah menjelaskan sentimen dan keyakinan terhadap ekonomi. Namun, struktur ekonomi negara untuk jangka masa panjang masih kukuh," katanya ketika membentangkan prospek ekonomi negara di sini hari ini.

Jelasnya, beberapa isu yang harus distabilkan termasuklah keadaan kecairan tempatan, penyusutan nilai ringgit, pengeluaran portfolio atau pegangan saham asing serta pengecilan lebihan akaun semasa negara.

Dalam pada itu, Zakariah berkata, bilangan individu, syarikat serta perniagaan yang layak berdaftar dengan cukai barang dan perkhidmatan (GST) perlu ditingkatkan bagi membaiki sumber pendapatan kerajaan yang terjejas ekoran kejatuhan harga minyak dunia.

Katanya, kerajaan tiada pilihan selain meningkatkan lagi kutipan cukai, namun bukan dengan menaikkan kadar GST kerana rakyat sedang menghadapi tekanan kenaikan kos hidup.

Perdana Menteri, Datuk Seri Najib Tun Razak akan mengumumkan pengubahsuaian Bajet 2016 esok sebagai respon terhadap kejatuhan harga minyak dunia kepada paras terendah sejak 12 tahun. Bajet 2016 yang dibentangkan pada Oktober 2015 adalah berlandaskan harga minyak dunia AS\$48 (RM206) setong, namun harga komoditi itu kini didagangkan sekitar AS\$28 (RM120) setong.

Malaysia dianggarkan kehilangan pendapatan sebanyak RM300 juta bagi setiap penurunan AS\$1 (RM4.29) setong harga minyak dunia.

Mengulas mengenai penyertaan Malaysia ke dalam Perjanjian Perkongsian Trans-Pasifik (TPPA), Zakariah berkata, negara perlu melakukan sesuatu untuk memperbaiki struktur ekonomi negara terutama sekali menaikkan nilai tambah produk-produk eksport negara.



Khamis, 28 Januari 2016

#### **16. Tiada projek kerajaan yang dibatal, dikurangkan kos**

PUTRAJAYA 28 Jan.- Kerajaan memberi jaminan tidak akan membatalkan atau mengurangkan kos projek-projeknya sama ada berimpak tinggi atau tidak, sejajar dengan pengubahsuaian Bajet 2016 yang diumumkan Perdana Menteri, Datuk Seri Najib Tun Razak, hari ini.

Sebaliknya, jelas Ketua Setiausaha Perbendaharaan, Tan Sri Mohd. Irwan Serigar Abdullah, selaras langkah pengubahsuaian itu, kerajaan akan hanya menyusun semula jadual aliran tunai bagi projek yang kurang memberi impak.

"Tiada projek yang dikurangkan. (Sebaliknya) apa yang kita buat adalah membuat keutamaaan (projek berkenaan). Jika ia tidak memerlukan wang dengan segera, kita akan menyusun semula aliran tunai berkaitan.

"Selain itu, kita juga akan menyelaras semula tempoh pembangunan projek yang hanya memerlukan pembelian tanah tanpa perlu dimajukan dalam masa dua tiga tahun lagi.

"Namun, beberapa projek termasuk (pembangunan) sekolah, hospital, jalan raya dan bekalan elektrik akan diteruskan seperti dirancangkan," katanya kepada pemberita selepas forum mengenai pengubahan Bajet 2016, di sini, hari ini.-BERNAMA